



Broj: 06-1-07-1-449/23
Sarajevo, 17.08.2023. godine
F.S.

Na osnovu člana 2.9 tačka 14. i 15. a u vezi člana 1.10 stav (1) tačka 2. i člana 13.7 stav (3) Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22 i 67/22), člana 6. stav (4) Zakona o izboru, prestanku mandata, opozivu i zamjeni načelnika općina u Federaciji BiH („Službene novine F BiH“, broj: 19/08), i člana 11. Uputstva o dodjeli i prestanku mandata ("Službeni glasnik BiH", broj 27/22, 77/22 i 78/22), u postupku provjere Izvještaja Komisije o provedenom postupku i rezultatima izjašnjavanja građana o opozivu načelnika Općine Stari Grad Sarajevo, Hadžibajrić Ibrahima, broj 140/23 od 04.08.2023. godine, Centralna izborna komisija Bosne i Hercegovine je, na 58. sjednici održanoj 17.08.2023. godine, d o n i j e l a

O D L U K U

- (1) Utvrđuje se da je postupak opoziva načelnika Općine Stari Grad Sarajevo, Hadžibajrić Ibrahima, proveden u skladu sa zakonom.
- (2) Mandat Hadžibajrić Ibrahima, načelnika Općine Stari Grad Sarajevo, prestaje danom pravosnažnosti ove odluke.

O b r a z l o ž e n j e

Centralnoj izornoj komisiji BiH je, dana 08.08.2023. godine, dostavljen akt, broj: 02-45-528/23 od 08.08.2023. godine, Komisije za provođenje postupka opoziva načelnika Općine Stari Grad Sarajevo, Hadžibajrić Ibrahima, te u prilogu istog akta i Izvještaj Komisije, broj 140/23 od 04.08.2023. godine, o provedenom postupku i rezultatima izjašnjavanja građana o opozivu načelnika Općine Stari Grad Sarajevo, kao i cjelokupna dokumentacija.

Uvidom u dostavljenu dokumentaciju utvrđeno je da je, dana 29.05.2023. godine, Inicijativu za pokretanje postupka opoziva načelnika Općine Stari Grad Sarajevo, Hadžibajrić Ibrahima, podnijela grupa od 23 vijećnika, od ukupno 31 vijećnika u Općinskom vijeću Stari Grad Sarajevo.

Na osnovu navedene inicijative, Općinsko vijeće Stari Grad Sarajevo je, dana 12.06.2023. godine, donijelo Odluku o pokretanju postupka opoziva načelnika Općine Stari Grad Sarajevo, broj: 02-45-392/23 od 12.06.2023. godine, te Odluku o imenovanju Komisije za provođenje postupka opoziva načelnika Općine Stari Grad Sarajevo, broj: 02-45-393/23 od 12.06.2023. godine ("Službene novine Kantona Sarajevo", broj 26/23).

Slijedom navedenog, postupak opoziva načelnika općine Stari Grad Sarajevo, Hadžibajrić Ibrahima, proveden je dana 23.07.2023. godine, o čemu je Komisija za provođenje opoziva načelnika Općine Stari Grad Sarajevo dostavila Općinskom vijeću Stari Grad Sarajevo Izvještaj o provedenom postupku opoziva i rezultatima izjašnjavanja građana o opozivu načelnika Općine Stari Grad Sarajevo.

Općinsko vijeće Stari Grad Sarajevo je na sjednici održanoj 08.08.2023. godine donijelo Odluku, broj: 02-45-527/23, o usvajanju izvještaja Komisije za provođenje postupka opoziva načelnika Općine Stari Grad Sarajevo o provedenom postupku opoziva i rezultatima izjašnjavanja građana o opozivu načelnika Općine Stari Grad Sarajevo, Hadžibajrić Ibrahima.

Odredbom člana 2.9 stav (1) tačka 15. Izbornog zakona BiH propisano je da Centralna izborna komisija BiH provjerava odluku nadležnog organa o prestanku mandata izabranog dužnosnika na svim nivoima neposrednih i posrednih izbora u Bosni i Hercegovini obuhvaćenih ovim zakonom, kako bi se osiguralo da je mandat izabranog dužnosnika prestao u skladu sa ovim zakonom.

Zakonom o izboru, prestanku mandata, opozivu i zamjeni načelnika općina u Federaciji BiH, član 6. stav (1), propisano je da inicijativa s obrazloženjem za pokretanje postupka opoziva načelnika može biti pokrenuta od općinskog vijeća ili 10% registrovanih birača na području općine. Stavom (3) istog člana propisano je da ako Općinsko vijeće donese odluku o prihvatanju inicijative opoziva načelnika, sprovodi se postupak u kojem građani odlučuju izravnim tajnim glasanjem. Mandat načelnika prestaje ukoliko natpolovična većina građana, koji su glasali, donese odluku o opozivu načelnika. Odluka građana je obavezujuća za općinsko vijeće i načelnika.

Centralna izborna komisija BiH je, u postupku provjere odluke Općinskog vijeća Stari Grad Sarajevo o usvajanju Izvještaja Komisije za provođenje postupka opoziva načelnika Općine Stari Grad Sarajevo i dostavljene dokumentacije Komisije za provođenje postupka opoziva načelnika Općine Stari Grad Sarajevo, utvrdila je sljedeće:

Komisija za provođenje postupka opoziva načelnika Općine Stari Grad Sarajevo je, dana 12.06.2023. godine, donijela Uputstvo za provođenje postupka opoziva načelnika Općine Stari Grad Sarajevo ("Službene novine Kantona Sarajevo", broj 26/23), te 20.06.2023. godine usvojila Poslovnik o radu Komisije, broj: 01/23 od 20.06.2023. godine, i Plan aktivnosti Komisije, broj: 02/23 od 20.06.2023. godine.

Dana 21.06.2023. godine, Komisija za provođenje postupka opoziva načelnika Općine Stari Grad Sarajevo je uputila Zahtjev za dostavu podataka, broj: 19/23, za glasače koji će svoje biračko pravo ostvariti putem mobilnih timova.

Političkim subjektima, koji imaju pravo na zastupljenost u biračkim odborima, upućena je obavijest o postupku žrijeba, koji je održan 26.06.2023. godine. O održavanom postupku žrijeba za pozicije u biračkim odborima Komisija za provođenje postupka opoziva načelnika Općine Stari sačinila je Zapisnik o postupku žrijebanja za dodjelu mjesta u biračkim odborima političkim subjektima, broj: 26/23 od 26.06.2023. godine.

Dana 30.06.2023. godine, svim političkim subjektima upućen je poziv za podnošenje zahtjeva za akreditiranje izbornih posmatrača, te je dana 03.07.2023. godine Komisija za provođenje postupka opoziva načelnika Općine Stari Grad Sarajevo donijela: Odluka o određivanju biračkih mjesta broj 32/23 od 03.07.2023. godine i Rješenje o imenovanju predsjednika i članova biračkih odbora kao i njihovih zamjenika za opoziv načelnika Općine Stari Grad Sarajevo, broj: 33/23 od 03.07.2023. godine.

Glasačima koji glasaju na redovnim biračkim mjestim omogućeno je ostvarivanje biračkog prava na 46 redovnih biračkih mjesta.

Biračko pravo je ostvarilo 4.786 birača, od čega je „ZA“ opoziv glasalo 3.721 birača, „PROTIV“ 1.030 birača, dok je 35 glasačkih listića bilo nevažećih.

Birači koji glasaju u odsutnosti i lično svoje biračko pravo mogli su ostvariti na redovnom biračkom mjestu 137A046, o čemu su birači obaviješteni putem web stranice Općine Stari Grad.

Nije bilo birača koji su glasali u odsutnosti i lično.

Biračko mjesto 137A046 je bilo ovlašteno i za izdavanje nepotvrđenih glasačkih listića. Biračko pravo za glasanje putem nepotvrđenih glasačkih listića ostvarilo je 6 birača, i svi su glasali „ZA“ opoziv. Za potrebe glasanja birača sa posebnih potrebama, formirana su 4 mobilna tima. Za glasanje putem mobilnog tima prijavljeno je 48 osoba. Biračko pravo je ostvarilo 43 birača, od čega je „ZA“ opoziv glasalo 29, „PROTIV“ 14 birača, a nevažećih glasačkih listića nije bilo.

Glasački listići za glasače koji glasaju putem pošte (njih 589), upućeni su 07.07.2023. godine, sa utvrđenim krajnjim rokom za prijem istih 10 dana od dana održavanja referenduma. Do navedenog roka, Komisiji za provedbu postupka opoziva pristiglo je ukupno 114 koverata, od čega je 58 neuručenih i 56 pošiljki sa glasačkim materijalom. U jednom paketu je bilo četiri (4) glasačka listića sa odgovarajućom dokumentacijom, što je Komisija prihvatila kao validne, a 17 pošiljki koje nisu imale identifikacione dokumente, Komisija je prilikom obrade podataka svrstala u nevažeće glasačke listiće.

Komisija je utvrdila da je 42 birača dostavilo valjanu dokumentaciju.

Prilikom brojanja, utvrđeno je da je „ZA“ opoziv glasalo 35 birača, a „PROTIV“ šest (6) birača, dok je jedan (1) glasački listića bilo nevažeći.

Na osnovu svega navedenog, rezultati provedenog opoziva načelnika Općine Stari Grad Sarajevo su sljedeći:

Kategorija	Broj potpisa na Izvodu iz CBS	Važeći glasački listići	Nevažeći glasački listići	ZA opoziv	PROTIV opoziva
Redovna BM	4,786	4,751	35	3,721	1,030
Odsutnost/Lično	0	0	0	0	0
Mobilni tim	43	43	0	29	14
Pošta	42	41	1	35	6
SVEGA:	4,871	4,835	36	3,785	1,050

Utvrđenim rezultatima sa biračkih mjesta od strane Komisije, građani su natpolovičnom većinom od 78,28 % donijeli odluku o opozivu načelnika Općine Stari Grad Sarajevo, Hadžibajrić Ibrahima, u skladu sa članom 6. stav (4) Zakona o izboru, prestanku mandata i opozivu i zamjeni načelnika općina u Federaciji BiH.

Centralna izborna komisija BiH je dana 17.07.2023. godine, zaprimila prigovor Begović Lejle, vijećnice Općinskog vijeća Stari Grad Sarajevo, putem opunomoćenika, advokata Karahodžić Indire, zbog neregularnosti i donošenja nezakonite odluke Općinskog vijeća Stari Grad Sarajevo, koji je 20.07.2023. godine dostavljen Općinskom vijeću Stari Grada Sarajevo na nadležno postupanje o čemu je obaviješten podnosilac prigovora.

Centralna izborna komisija Bosne i Hercegovine uputila je, dana 29.06.2023. godine, zahtjev Federalnom ministarstvu pravde za dostavljanje Mišljenja o tome da li je inicijativa i odluka o pokretanju postupka opoziva u skladu sa zakonom.

Federalno ministarstvo pravde je, dana 27.07.2023. godine, dostavilo Centralnoj izbornoj komisiji BiH akt, broj: 09-45-2198/23 od 19.07.2023. godine, kojim je ustanovljeno da je procedura

pokretanja postupka opoziva načelnika Općine Stari Grad Sarajevo provedena u skladu sa Zakonom o izboru, prestanku mandata, opozivu i zamjeni načelnika općina u Federaciji BiH.

Dana 10.08.2023. godine, zaprimila prigovor Begović Lejle, vijećnice Općinskog vijeća Stari Grad Sarajevo, putem opunomoćenika, advokata Karahodžić Indire, zbog povrede i neregularnosti procedure u provođenju referenduma za opoziv načelnika.

U dostavljenom prigovoru navodi da prije održavanja referenduma nisu dostavljeni glasački listići u domove starih i iznemoglih lice, da u vrijeme održavanja referenduma nisu obišli bolnice niti KPZ ustanove čime su biračima uskratili biračko pravo, da glasački listići nisu imali zaštitu, pa je time omogućen tzv. „Bugarski voz“, kao i da su se pojedini vijećnici slikali prilikom glasanja i slike i komentare objavljivali na društvenim mrežama, što podnosilac prigovora smatra da je protivzakonito.

Nadležnosti Centralne izborne komisije BiH u postupke prestanka mandata utvrđene su članom 2.9 tačka 15. Izbornog zakona BiH, te u skladu sa članom 6.9 Izbornog zakona BiH na odluke Centralne izborne komisije BiH omogućen je redovan pravni lijek, odnosno, može se podnijeti žalba nakon donošenja odluke.

Na osnovu svega iznesenog, Centralna izborna komisija Bosne i Hercegovine je utvrdila da je postupak opoziva načelnika Općine Stari Grad Sarajevo proveden u skladu sa odredbama Izbornog zakona Bosne i Hercegovine i da su ispunjeni uslovi iz člana 1.10 stav (1) tačka 2. Izbornog zakona Bosne i Hercegovine za prestanak mandata Hadžibajrić Ibrahima, načelnika Općine Stari Grad Sarajevo, te je, na osnovu člana 2.9 tačka 14. i 15. a u vezi člana 1.10 stav (1) tačka 2. i člana 13.7 stav (3) Izbornog zakona Bosne i Hercegovine, člana 6. stav (4) Zakona o izboru, prestanku mandata, opozivu i zamjeni načelnika općina u Federaciji BiH, te člana 11 Uputstva o dodjeli i prestanku mandata, odlučila kao u dispozitivu ove Odluke.

Ova odluka će se objaviti na internet-stranici Centralne izborne komisije Bosne i Hercegovine www.izbori.ba i smatrat će se da je danom objavljivanja ista dostavljena svim učesnicima u opozivu načelnika Općine Stari Grad Sarajevo.

Pravna pouka: Protiv ove odluke dozvoljena je žalba. Žalba se podnosi Apelacionom odjelu Suda Bosne i Hercegovine u roku od dva dana od dana prijema ove odluke preko Centralne izborne komisije Bosne i Hercegovine, u skladu sa članom 6.9 stav (1) i stav (2) Izbornog zakona Bosne i Hercegovine.



Zamjenjuje predsjednika

Dr. Ahmet Santić, član CIK BiH

Dostavljeno:

- Hadžibajrić Ibrahim,
- Općinsko vijeće Stari Grad Sarajevo,
- a/a.